

SAMBAYAN MINGGU ENASIMKE (LITURGI ETNIK BUDAYAKE)

TASOSAN ITY

- Kantorianare (*Prokantor*) rajar inaoranare ma ity
- Kerkeratare rsambayan ti Konsistorike
- Kerkeratke it a byaca britke ti iry matohakare (*wartake*)

A. TSARA ITY EBUT HULASOKWE

01. INAORAKE/RFORUK/RABUK BEW/RAHOAK

Rkohw tihalke kdi a kla-telw, desikeo **taktemtem tamdiry**, ode taora inaorake bonyo, iry makarya ti sambayan ne, raktemtem rsukar ei wen tasambayan tike.

TAORA INAORAKE: GPM NO: 15: 1 (*dete lemamo bisa ma teluk kyor inaora salik maka kbuan maola inaora ne, dete lemamo bisa ma RFORUK, ta RABUK BEW, ta RAHOAK. Nam nekre mumu ne musti mo ral toha Kitab Lanke kralake*)

02. TUN ERAS MAMUNAKE

PF : O Hulasow O! Aramy myalan O, ode aramy mlyeru Animkwe, kali nelnyely a O.

J : Ou Mlay!

PF : Aramy msyalak eraske ba ti O, kali mor aramy ti sew kyaki nekre nini aramy myait senwe mane, desikeo eras-eras aramy bo.

J : Ou Mlay!

PF : Ode kuten ma mhwarak mamak aramy ti mingguke krala ne.

J : Ou Mlay!

PF : Inaka eras manosy Hulasokwe kimin ti ribun matohak a e ne mumu.

J : Ode kimin o dakun.

PF + J: Ou Mlay, tleru ity Ebutke Anike!

03. TAORA INAORAKE (*inaora kali tamukmuka tamarmara ity*)

“Senweke Sew ity Ebutke” (“Hari ini harinya Tuhan”) (dete lemamo bisa ma teluk kyor inaora maka kbuan maola inaora ne)

Eno, amo, amno waikw,

Mmya ma taktemtem, tamukmuka ity,

Kali senwe, Sew eraske,

Sew ity Ebutke, Sew ity Ebutke.

Mmya ma tamukmuka ity mumu.

Taora ma tleru Anike.

Sew eras ne, Sew eras ne, kyahuk ity mumu.

04. IRY MATOHAKARE TOU ITY WAIT LIM O SAL

Pnt : O ara Ebumy Hulasow O,

Ti ara wasimy mormyorif sew kyaki nekre,

Aramy myou ohe aramy neke kyalamo lema aramy mtyoha nam mutanukare;

J : Aramy mimorif ne aramy mtyoha ara wasimy dakdyakin mesmesanare bo;

Pnt : Ara tunamire dakun o, lema kyala irire ma ramukmuka sir, de kyala sir ma ralatare ksunw;

J : Aramy neke mihmway iry, aramy mikanak iry, aramy mihes iry ma anitare kiray, aramy mihor irire wait sey kralanare ode wait tun o snyary;

Pnt : Aramy mdyakin ma mihnutuk utno arwala ne ode irire wait namit-namit;

J : Aramy mimorif ne lema aramy byu ma iry syalik a rbilak aramy, de aramy mbyu ma mkyordalam sir bo.

Pnt + J : Taora inaora PKJke no. 43:1 (*bisa ma teluk kyor inaora salik maka kbuan maola inaora ne*)

EBO, ARAMY MMYORIF TI LIM O SAL

do = f 4 ketuk

5 . 6 | 5 . . . | 5 0 3 3 4 3 4 6 5 . 3 3 . | 3 . ’

E-----bo, aramy mmyorif ti lim o sal,

3 . 1 | 2 . . . | 2 0 2 2 2 1 4 3 | 1 . 1 . | 1 . :||

E-----bo, mswos a lim o sal ne----kre ba.

Pnt : Aramy mimorif ne lema aramy mbyu ma irire rhareta aramy, de aramy mimorif neke aramy mbyu ma mhyareta ara tenamire kmyesan bo;

J : O Hulasow O, maditi ara wasimy ktela atyat nekre ba, ode mswos ara wasimy lim o sal nekre ba dakun.

Ode maharw a ara ralamy kralanare, ti nam aramy mirekanare, nam aramy mitanukare, ode nam aramy mialanare, ma nam nekre mumu ne eras ma ktyabal a ktyabal toha; ma ara wasimy karyaa kralanare, neke kika kbuan ma kyety eraske dakun ti nam muala nekre mumu ti nuske ktem ne.

Pnt : Ara Ebumy Yesus O, aramy myal Animkwe ma aramy msyambayan.

Pnt + J : Ou Mlay! / Nde! / Mlol de! / Ou go!

05. TAORA INAORAKE (*tal inaora maka kbuan maola taou ity wait lim o sal ne*)

06. BRITKE OHE ERAS MANOSY HULASOKWE KSYOS LIM O SAL

PF : Iry matohak a ity Ebutke ilobak e, ti iry a maou wasi lim o sal nekre, mtyomolu britke ohe Hulasokwe syos lim o sal nekre kolnye:

“Esei desike tyohak ti Yesuske, desikeo Hulasokwe ana syos iry desike wasi lim o sal ba, khyali Yesuske Anike.” (tal toha Kisah Para Rasul 10:43)

07. TAORA INAORAKE

KJ. NO: 157: 1-2 (*dete lemamo bisa ma teluk kyor inaora salik maka kbuan maola inaora ne*)

08. NAM MASUSU MORMYORIF HARHARKWE(*tmesan tamdiry bo*)

PF : Waikw o hatnimakw e! *“Kristuske yala koldyesy ma yilik ity ma wasi iry a ity, ode byabtis a ity kyor werke ode tunanare, ma syos ity wait lim o sal ba, ma yala ity ma nelnyelnyely a ity. Yala koldyesy ma wasi iry matohak ity ne nelnyelnyely a ity, ma kyait ma yabuk ity ma ti tamdiry ma tsara I, desikeo lema taka ity wait lim o sal tebibikan elik.”* (tal toha Efesus 5:26-27)

09. TAORA INAORAKE..... (*taora maktei o tmesan ttaklulw bo*)

B. TBACA KITAB LANKE ODE TABRITA HULASOKWE TUNANARE

10. TSAMBAYAN MA TBACA KITAB LANKE

Kerkeratke it (Pnt) syambayan (*dete lemamo yaso matohakare ma taora PKJ, NO: 15: 1, dete lemamo bisa ma teluk kyor inaora salik maka kbuan maola inaora ne*)

11. TBACA KITAB LANKE (*taliku ity ti babacake*)

12. RABRITA HULASOKWE TUNANARE (*khotbake*)

13. MAMWAW ITY MA TREKAN HULASOKWE TUNA NENMO RABRITA
NEKRE (*fluitke kdudu*)

14. TAORA INAORAKE

C. IRY MATOHAKARE RHALAS HULASOKWE TUNANARE

15. TOU ITY WAIT TOHTOHAKKE (*tmesan a tamdiry, maktei o tmesan a ttaklulw bo*)

PF : Taktemtem a tou ti ity wait tohtohakke kola Yesuske wasi
nyasoare wait tohtohakke, neke ttanuk kolnye:

PF + J :

Ktwohak ti Hulasokwe,
ity Amat Lan Lahukke,
Maala laitke ode lasmyer ne.

Ode ktwohak ti Yesuske,
neke Hulasokwe Anan sasasam ne bo.

Ma Hulasokwe syusu I ma ika Raja ode yaorif irkye,
ode I neke ika Raja ma ity.

Ma Hulasokwe Memeanke kyarya ti Maria ma idur hahak I.

Maria neke warar murke ma wamwankye it a lenla yenaf yor i
dakun.

Ode Yesus neke yety ti de yety ma ti masunkwe ti haret Pontius
Pilatuske,

Ode rbakw a I ti tul masanwalw ike ma myaty, ma ramlin a I.

Ma yorw ei mamaty rala,

ode sekwe enatelw bonyo, myorif huruk toha iry mamatire.

Ma syai ei wen sra eras Hulasokwe imin tike,

ma tyaklulw ti ity Amat Hulasow Lan Lahukke seri wanke.

Ode ana mya huruk ma yukun iry mamorifare ror iry mamatire.

Ktwohak ti Hulasokwe Memeanke.

Gereja Nelnyely Sasamke.

Iry nelnyelire rawahuk sir.

Lim o sal Hulasokwe syos ba.

Irkye ana myorif huruk.

Ode mormyorif manal nini namke.

Neke mlay.

(tmesan a ttaklulw bo)

16. MAORANARE RAORA : PS/VG/dsb

17. TAL ITY WAIT NATZARARE TI HULASOKWE

a. Kerkeratke it a tyanuk: *(Dkn)*

Ity Ebutke yal eraske ma ity ti tamorif ne. Lemade mmya ma tsalak eraske ba ti I, dendye senweke tal ity wait natzarare ti I. Yesuske tyanuk de byohe, “*Kolnye tal ti irire mo, kyety eraske ma ity ma kbyilak ti kolnye irire ranal ma ity ne.*” (tal toha Kis. 20:35)

b. Tluk ity wait natzarare ti wanire *(maily natzarare rmenari ma rily a natzarare ti wait wanire)*, desikeo taora inaora PKJ 264 “Wasimw Sambayanke Kbuan Sai” *(dete lemamo inaora salik maka kbuan maola inaora ne)*

c. Kerkeratke syambayan: *(Dkn)*

O Hulasow O, nam aramy minal nekre mumu neke Oi neke mal ma aramy.

O Kristus O, nam aramy mikita nekre mumu neke kyosy a O, kali wasimw loblobakke lan.

O Hulasokwe Memean O, meuk nam aramy mimorif ti nekre mumu ma kdi ti ma aramy, ma ktyoha mubuke bo. Ode malkyaw aramy ti mimorif ne, ma aramy mihe a misakar wasimw

loblobakke ode wasimw eraske ti nam muala nekre mumu.
Neke Mlay.

18. TAORA INAORA PKJ, NO: 264: 1-3 (*dete lemamo bisa ma teluk kyor
inaora salik maka kbuan maola inaora ne*)

19. MAORANARE RAORA : PS/VG/dsb

20. SAMBAYAN MABAA KLENKE (*syafatke*)

Masambayanke syambayan.

*(Masambayanke syambayan, desikeo tkus sambayanke tor sambayan
Yesuske iajar ma ity ne, neke kolnye:)*

Oo, ara Amamy a mamin ti wen a sra eras so.

Aramy miten ma aramy mumu ti lasmyerke khaha ne myalan a O,
kali Animkwe nelnyely.

Aramy miten ma mmwa kola Rajake ne, ma mhwareta aramy
mumu,

ma nam sai mtwanuk, desikeo iry mamin ti lasmyerke khaha
neke rtoha,

kola dene irire ratomolu O ti wen sra eras mumin tike.

Aramy miten toha O ma senweke,

mal kotw o abw ma kyoat mamak ma aramy.

Ode mswos ara salamire ba,

kola dene, aramy misos iry maka salat ma aramy ne dakun.

Ode kete mlwura aramy

ma nam dum a khyury aramy ma

kyor aramy ei atyatke,

de aramy miten toha O ma,

maditi aramy toha ktela atyat desikre mumu.

Kali Oi ne lan a O,

ode mkwumak haretke,
ode wasimw madelahke
kyal nini nam ti kiba knaru ne.
Ou, Mlay!

D. NYANOKE ODE ERASKE

21. TAORA INAORAKE (*tmesan tamdiry*)

22. TTOMOLU NYANOKE ODE TAL ERASKE

PF : Waikw o hatnimakw e, ity wait sambayanke ktei de. Dendye myulak e bai wasimy seire. Ode mbya o mnyenas ma mihe a misakar Hulasokwe Tuna dai mitomolu nekre, ti esei ta esei bo. Kali Yesuske yaso ity, ma tbai sal kakan o lan mamin nus o hnu nekre, ti wen a irire ranosy ti de ranosy ma nekre mumu, ma tabrita Brit Eraske ti sir.

PF : Lemadendye myal eraske toha Hulasokwe:

“Eras manosy ity Amat Hulasokwe kimin a e, ode wasi inaka eraske kyor a e ti kiba knaru ne!”

J : Ou Mlay! Ou Mlay! Ou Mlay! (*Taora/Rforuk/Rabuk Bew/Rahoak*)

(ttaklulw)

..... Mamwaw ity

20. TAORA INAORA MA TAKUMAK SIM (*kolnye lema taora, desikemo rohw a fluitke*)

(Desikeo iry matohakare tamdiry ma it de ikumak sima yor it, malmata takumak sim bonyo, kerkeratare rba ti ramdiry ti sahlahanare ma rakita ma rakumak sim a ror iry matohakare.)